

ዔርሚያሴኮ ቃዮ ማፃኣፖ ዓይያ ካር

ዔርሚያሴኮ ቃዮ ማፃኣፖ፡- ኪሪሰቶሴ ሾይንታንዳሂኮ ቤርታ ደንጎ ጄኤታና ሳሊታሚ ላሆ ማዓ ሌዖይዳ ዩሩሳላሜ ካታማ ሻሂንቲህሮ፤ ጊንህ ሃሃ ዓኢካ ናንጋ ዴራኣ ዳውሲንቲ ዴንዴህሮ ዖዪ ካላሎና ደንጎ ካላሊ ዓርቄያኬ። ሃኖ ማፃኣፖይዳ ዓኣ ባካ ባሼ ዩኤፒ ዛላና ሲዩ ዛላ ከኤዛያ ማዔቴያ ዖኦሲዳ ጉሙርቂህ ጌሥህ ዛላንታ ሃጋኣ ማዓንዳ ዎዛ ጌህ ናንጊህ ዛላኣ ከኤዛ ቤሲ ዓኣኔ፤ ዩያቶ ካላሎ ኪሪሰቶሴ ሾይንታንዳሂኮ ቤርታ ደንጎ ጄኤታና ሳሊታሚ ላሃሳ ሌዖና ዓጩሎይዳ ሄሌ ባይሲንቶ ማሊ ጶቂህኒ ዓይሁዶ ዓሳ ሙኡዚ ሃሺህና ዖዪህ ካኣሺ ሌዓ ሌዓ ካኣሽካ ዎዶና ዩያቶ ካላሎ ናባባኔ።

ማፃኣፔላ ዲማ ዲማ ዓርቄ ባኮ

- ቤርታሳ ቃዮ፡- ዩሩሳላሜ ሜታጴ ሜቶንታ ዖዪንቲ ዖዪያ (1:1-22)
- ላማሳ ቃዮ፡- ዖኦሲ ዩሩሳላሜይዳ ዓጌ ዴኤያ ሜቶ (2:1-22)
- ሃይህሳ ቃዮ፡- ሃጊ ማዓንዳ ዎዛ ባኣዚ ዓኣያ ማዒያ (3:1-66)
- ዖይዳሳ ቃዮ፡- ዩሩሳላሜኮ ባይሲንቶ (4:1-22)
- ደንጋሳ ቃዮ፡- ማኣሪህ ዴንቃኒ ሺኢቂንታ ሺኢጲህ (5:1-22)

ዩሩሳላሜ ካታሞኮ ሜቶንታ ዖዪያንታ

- 1 ሃያኮ ቤርታ ዓሲ ኩሚ ዓኣ ካታሚላ
 - ሃህ ዎዎይቲያ ሃሺንቲ ቤሲ ማዒ ዓቴንቲሞ!
 - ዓጩ ባኣኮይዳ ዴኤፒ ማዒ ዓኣዛ
 - ዓኒ ሃይቄ ላኣሊጉዲ ማዔንቲሞ!
 - ዲማ ዲማ ፓቂንቲ ዓጩፓ ጌኤሾ ማዒ ዓኣዛ
 - ሃህ ዓይሌ ማዒ ዴዔኔ።

- 2 ዒዛ ዲሞና ዒናፓ ዩኤካኔ፤
 - ዓሲያ ዒዛኮ ጋጋጮና ሊካ ከዳኔ፤
 - ዒዛ ሃያኮ ቤርታ ናሽካ ዓሶ ቢያህዳፓ
 - ዒዛ ደዲሻ ዓሲ ፔቲታዖ ባኣሴ፤
 - ዒዛኮ ላጎ ማዔ ዓሳ ቢያ ዒዛ ሃሹኔ፤
 - ሞርኬ ማዒያኣ ዒዛይዳ ዔቄኔ።

- 3 ዪሁዳ ዴራ ሚርጌ ዋኣዪንቲ ዓይላቶ ማደዋ ማዴሰካፓ
 ዲዒንቲ ዔውቲኔ፤
 ሃሢ ዔያታ ማሌ ዴሮ ባኣካ ናንጋኣና
 ፔቲታዎ ዔያቶኮ ሃውሾ ባኣሴ፤
 ዔያታ ሚርጌና ካራ ባይዚ ዓኣንቲ
 ዔያቶ ዳውሳ ዓሳ ሙኪ ሄሌኔ።
- 4 ዎኣኒያ ዒኢካ ቦንቺንታ ቦንቾ ቦንቻኒ ሙኪንዲዋኣሢሮ
 ጂዮኔ ዴኮ ባንሢ ዴንዶ ጎይፃ ቦቦይታሳያ ዔዌ ማዓንዳኔ፤
 ዬሩሳላሜ ጌሎ ካሮና ጌላ ዓሲንታ ኬሰካ ዓሲያ ባኣሴ፤
 ዒኢካ ዓኣ ቄኤሳ ማታዲ ፔ ዒኖና ዚኢሊንታኔ፤
 ዉዴሮ ናኣታኣ ዎዪ ማታዲኔ፤
 ጂዮኔ ካራ ባይዚ ማታዲሢዳኩ።
- 5 ዒዛ ሚርጌ ጎሜ ማዴሢሮ
 ናንጌና ናንጋ ጎዳ ዒዛ ማቶይዳ ዓጌኔ፤
 ዒዛኮ ናኣቶ ሞርካ ዲዒ ዔኪ ዴንዴኔ፤
 ዒዛኮ ሞርካ ዒዛ ዎይሃያ ማዔሢሮ
 ሞርኮም ዔኤቢ ጌኢጌኔ።
- 6 ዬሩሳላሜኮ ቦንቺንታ ቢያ ባይቂ ጋፔኔ፤
 ዒዛ ዎይሢ ሱኡጋ ሄንቆ ቤሲ ባይዜ ሞይሌ ማዔኔ፤
 ዔያቶ ኬማ ዓሳ ዳውሳዛ
 ዎልቃ ዔያቶኮ ጋፒ ላባንዲያ ሄላንዳኣና ዔያታ ጳሽኪ ፑኔኔ።
- 7 ዬሩሳላሜ ዴራ ካራ ባይዚ ማታዲ ዋኣዪንታ ዎዶና
 ሃያኮ ቤርታ ዔያቶኮ ዓኣ ባኮ ማሊ ጳቂሃንዳኔ፤
 ዔያታ ሞርኮ ኩጮ ጋሮ ጌላዛ
 ዔያቶ ማኣዳ ዓሲ ባኣያ ማዓዛ
 ሞርካ ዔያቶኮ ካታሞ ዶዒዎ ዛጋዎ ማኢጨኔ።
- 8 ዬሩሳላሜ ዴኤፒ ጎሜ ማዴኔ፤
 ዬያሮ ዒዛ ዒኢቲያ ማዔኔ፤
 ዒዛ ዑዎ ካላዲ ዓኣንቲ ዔያታ ዛጌሢሮ
 ቦንቻ ዓሳ ቢያ ቦሃ ዒዛ ቶኣቻኔ፤
 ዓኣፖ ካሮዋ ዔያቶ ቤርታፓ ዚኢሊንቲ ዒዛ ሺርሺኔ።
- 9 ሻቲማ* ዒዛኮ ማኣዓሢዳ ጴዴኔ፤
 ሃጋ ዒዛ ዓይጌ ሄላንዳቲያ ዒዛ ማሊባኣሴ፤
 ዒዛኮ ሎኦሚፃ ዓሲኮ ዑሰካ ጌላያኩ፤

* 1:9 ሻቲማ:- ዬኖ ጌይንቲሢ ዬሩሳላሜኮ ጎሞ ዔርዛ ማላታ ማሂኩ።

- ዒዛ ዶዲሻ ዓሲያእ ፔቴታዎ ባኣሴ፤
 ሞርካ ዒዛ ባሼሢሮ
 ዬያ ማቶ ዒዛኮ ዛጋንዳጉዲ ናንጊና ናንጋ ጎዳ ዒዛ ሺኢቄኔ።
- 10 ዬሩሳላሜ ዳርኮ ዴኤፒ ቦንቸንታያ ማዔ ቆሎ ሞርካ ጌሊ ቡሬኔ፤
 ናንጊና ናንጋ ጎዳ ዳር ባኣኮ ጌሎዋጉዲ ላኣጊንቴ
 ማሌ ዓሳታዎ ዓቱዋዎ
 ጌኤዠ ማእሮ ጌላንቴ ዒዛ ዴንቄኔ።
- 11 ዴራ ዒዛኮ ሙዖንዶ ባኣዚ ባይዚ ዒላቲዳኬ፤
 ዔያታ ሃይቄዋዎ ሸምፔና ናንጋኒ
 ጌኤኮ ዓኣ ቆሎ ቢያ ሙኡዚና ያኣካኔ፤
 ዬሩሳላሜ ዴራ «ናንጊና ናንጋ ጎዳሢዮ! ኑም ማሌ!
 ኑኡኮ ዳውሲንቶ ቢያ ዛጌ!» ጌይ ዒላታኔ።
- 12 ናንጊና ናንጋ ጎዳ ጌኤኮ ዴኤፖ ዳጎ ኑጊዳ ጮኣሸኬ ኬሎና
 ኑና ሄሌ ማቶጉዴያ
 ማታ ሄሌ ዓሲ ዓኣቶ
 ሃንዳ ዒንሢ
 ጎይዖና ሴካ ሃንጋ ሃንታ ዓሳ ዛጉዋቴ!
 ዬይ ባካ ዒንሢሞ ሸሌዔ ባኣዚ ማላ?
- 13 «ሎኦፓ ታሚ ዒዚ ኬይሴኔ፤
 ዬይ ታማ ሚቸ ማጌዖ ጋሮ ኑኡኮ ዴንዴኔ፤
 ቶኮም ኑኡኮ ቡኡዶ ፒሮ ፒሬኔ፤
 ጊንሢሞ ኑና ጎቺ ማሄኔ፤
 ዒኖ ኑኡኮ ባይዚ ፔቴ ኬሊ ጉቤ ዑዖ ኑኡኮ ዶጪሴኔ።»
- 14 «ዳቢንታ ታኣኮ ዎሊ ዑፃ ዳዒንቲ
 ባቃኖይዳ ቃንባራጉዲ ጌሢንቴኔ፤
 ዬይ ሚርጌ ዴኤፃያ ማዔሢሮ ዎልቄ ኑኡኮ ባይዜኔ፤
 ኑኡኒ ቃዛኒ ዳንዳዑዋ ኑኡኮ ሞርኮም ዒዚ ኑና ዔኪ
 ዒንጌኔ።»
- 15 «ኑና ካፓ ፖኦሊሶ ናንጊና ናንጋ ጎዳ ዒዳ፣ ዔኪ ሺኢሸኔ፤
 ኑኡኮ ዴጌሢኮ ዎልቆ ጋኣጫኒ ያልዚ ዓሲ ኑጊዳ ዳኬኔ፤
 ያኦኒያ ጫርቄ ጌሊ ቤቄባኣ ካታሞይዳ ናንጋ ኑኡኮ ዳር
 ዎይኖ ጩኡጶ ቤዛ ሄርቄንታ ዎይኔጉዲ ሄርቄ ዒዚ ዳኣጻኔ።»
- 16 «ሞርካ ኑና ባሼሢሮ ናኣቶም ኑኡኮ ካራ ባይቄኔ፤
 ኑና ዶዲሻ ዓሲ ባይቄሢሮ

ዓቢሢ ላኣሊ ላኣሊ ኑኡኒ ዩኤካኔ።»

17 «ጂዮኔ ኩጮ ፔኤኮ ሌካ ዔቁሴኔ፤
ጋዓንቴ ዒዞ ማኣዳ ዓሲያኣ ባኣሴ፤
ዓሺኖ ማዔ ዓጮይዳ ዓኣ ዓሳ ቢያ ያይቆኦቤ ዜርዖኮ
ሞርኬ ማዓንዳጉዲ ናንገና ናንጋ ጎዳ ዓይሤኔ፤
ዩሩሳላሜ ዔያቶ ባኣካ ዒኢቴ ባኣዚ ማዔኔ።»

18 «ዒዚ ዓይሤ ባኮ ዔያታ ዋይዞ ዒፃሢ፤
ዒ ማጴ ባኮና ናንገና ናንጋ ጎዳ ዳቢንቴባኣሴ፤
ዒንሢ ጴሩ ቢያ ዋይዞ፣ ማቶዋ ታኣኮ ዛጉዋቴ፤
ጴጌ ማዔ ዓቴንቆንታ ዉዲራሢንታ ታኣኮ ዲዒንቴ ዔውቴ።»

19 «ታኣኮ ላጎ ታኣኒ ዔኤሌኔ፤
ዔያታ ጋዓንቴ ታና ዒፃኔ።
ቄኤሶንታ ሱኡጎንታ ቢያ ፔኤኮ ሹምፓሢ ዓውሳኒ
ሙዖ ኮይይይዳ ዓኣዖ ዒኢካ ካታሞ ሳዛ ጎይይይዳ ሃይቄ።»

20 «ናንገና ናንጋ ጎዳሢዮ!
ታኣኒ ካሩ ባይቁ ሜታዲ ዋኣዩሢዳ ዓኣሢ ኔ ዛጉዋዳ?
ታኣኒ ኔኤም ዋይዞ ዒፃሢ ጎጳ ታኣኮ ዋኣፃ። ዒናኣ ታኣኮ
ዖዩኔ፤
ካታሞ ሳዛ ዓኣ ጎይይይዳ ማዖም ኬኤይይዳ ጴሩ ታኣኮ ሃይቁ
ኩዳኔ።»

21 «ታኣኒ ሜታዲ ዩኤካ ዩኤፖ ዓሳ ዋይዜኔ፤
ጋዓንቴ ታና ደዲሻ ዓሲ ፔቴታዖ ባኣሴ፤
ታኣኒ ካሩ ባይዚ ዋኣዩንታሢ ሞርካ ቢያ ዋይዜኔ፤
ኔ ማጴ ባኮ ዛሎና ዔያታ ዋዛጴኔ፤
ሃዳሩ ኔኤኒ ጌዔ ኬሌላ ዩዖንጎ፤
ዔያቶይዳኣ ታና ሄሌ ባኮጉዴያ ሄሎንጎ።»

22 «ዔያቶኮ ፑርቶ ማጴ ቢያ ዛጌ፤
ታኣኮ ዳቢንቶ ቢያሢ፤ ኔኤኒ ታጊዳ ሄሊሴ
ፑርቶ ባኮጉዴያ ዔያቶይዳኣ ሄሊሴ፤
ታኣኮ ሜቶ ዩኤፓ ዲቤኔ፤ ዒናኣ ታኣኮ ላቤኔ።»

2

ናንጊና ናንጋ ጎዳ ዬሩሳላሜይዳ ዓጌ ሜቶ

- 1 ናንጊና ናንጋ ጎዳ ፔ ዳጎና ጊዮኔ ዳውሲሴኔ፤
 ጫሪንጮ ለካ ከሰኪ ዳጊ ጌይ ዳዔዞ
 ዒሰራዔኤሌኮ ሄርሺንቶዞ ዒዚ ሳዓ ጎቹ ዔኪ ከኤሬኔ፤
 ዒዚ ዳጋዴ ዓቦና ዒዛኮ ቶካ ሄርቃ ቤዜሎ
 ዔኤቢኬያ ጌይ ሺሪ ዛጊባኣሴ።
- 2 ናንጊና ናንጋ ጎዳ ዒሰራዔኤሌኮ ናንጎ ቤዞ ቢያ ሚጪንቱዋዎ
 ባይዜኔ፤
 ዒዚ ዳጋዴ ዪሁዳ ዳሮኮ ዋርዲዮ ሻሄኔ፤
 ዒኢካ ዓኣ ካኣቶና ቢታንታ ዓኣ ዓሶና ሳዓ ዔኪ ዠቢ
 ዳውሲሴኔ።
- 3 ዒዛኮ ዳኤፖ ዳጎና ዒሰራዔኤሌኮ ዋልቆ ቢያ ላቢሴኔ፤
 ዋርካ ዒሰራዔኤሌይዳ ሙካኣና ዒዚ ዔያቶ ማኣዶ ሃሺ
 ያይቆኦቤ ዜርፆይዳ ፔኤኮ ዳጎ ታሞ ዔኤሀኔ፤
 ከይላ ዓኣ ባኮ ቢያ ሙዓ ታሚጉዲ ሙዔኔ።
- 4 ዒዚ ዋርኬጉዲ ሂኢዠና ፔኤኮ ኦና ዱካኒ ዓኣሀኔ፤
 ዒዛኮ ሚዛቆ ኩጫ ኦና ማኣሳንሣኒ ጊኢጌኔ፤
 ዬሩሳላሜይዳ ዓኣ፣ ኦኡኒ ናሻካ ዓሶ ቢያ ዒ ዋዳኔ፤
 ፔኤኮ ዳጎ ታሚጉዲ ዒዚ ዔኤሀኔ።
- 5 ናንጊና ናንጋ ጎዳ ዋርኬጉዲ ማዒ ዒሰራዔኤሌ ባይዜኔ፤
 ካኣቱሞ ማኣሮዋ ዶይሲ ኩርሴኔ።
 ዋርዲዮ ሻሄኔ፤
 ዪሁዳ ዳሮይዳ ዬኤፒና ዒላቲና ዲቢሼኔ።
- 6 ናንጊና ናንጋ ጎዳ ፔኤኮ ጌኤዠ ማኣሮ ጎሺዳ ዓኣ ዉልሻጉዲ
 ሻሄኔ፤
 ጊዮኔይዳ ቦንቾ ቦንቾንታ ሃውሾ ከሎዋ ዓይሴኔ፤
 ፔኤኮ ዳኤፖ ዳጎና ካኣቲንታ ቄኤሶዋ ዳውሲሴኔ።
- 7 ናንጊና ናንጋ ጎዳ ዒዛሞ ዒንጎ ባኮ ዒንጎ ቤዞ ቦሄኔ፤
 ፔኤኮ ጌኤዠ ማኣሮዋ ሃሺኔ።
 ካኣቱሞ ማኣሮኮ ከኤሎ ዲያ ዋርካ ዶይሳንዳጉዲ

ዒዚ ዓኣሢ ሞርኮም ዒንጌኔ፤
ዬያሮ ሞርካ ቦንቾ ከሊና ማዲንታ ጎይሢ
ጌኤዠ ማኣሮይ ዎዛና ኮርጌኔ።

8 ናንጊና ናንጋ ጎዳ ዬሩሳላሜ ካታሞኮ ከኤሎ ዲያ ሻሂኒ ገኢጊ
ሚያ ሱዞ ሊካ ከይሴኔ፤

ካታሜሎ ባይዚፃፓ ገንሢም ጌይባኣሴ፤
ካታሞ ካፖ ዴጌ ከኤሎ ዲፃኣ ዲኡቁ ሻሂንቴኔ፤
ዬይ ቢያ ፔቴና ዶዔኔ።

9 ካታሞ ጌሎ ካሮ ዎዶ ካራ ሳፖ ዳማ ዱኡኪንቴኔ፤

ኮምባልቁ ዎዶ ጋጋርዛኣ ሜቂ ሜቂ ጋፔኔ፤
ካኣቲንታ ዒዚ ቢታንቶ ዒንጌ ሱኡጎንታ
ሜሌ ዳሮ ባኣኮይዳ ዳውሲንቲ ዳንዲ ዓኣኔ፤
ሙሴ ዔርዜ ዎጎ ሃካፓ ሴካ ከኤዚ ዔርዛ ዓሲ ባኣያ
ማዓንዳኔ፤
ፆኣሲ ማሊያ ከኤዛ ዓሶም ሃካፓ ሴካ ናንጊና ናንጋ ጎዳ ፔጋሲ
ዳዎንዳ ባኣዚ ባኣሴ።

10 ዬሩሳላሜ ካታሞይዳ ዓኣ ጋርቻ ሳዓ ዘቲ ጌይ ዳዔኔ፤
ዔያታ ፔኤኮ ቶኦኮይዳ ሲላሊ ዎሂ፥ ሲዬ ፓቲሌያ ማኣዔኔ፤
ዒኢካ ካታሞይዳ ዓኣ ዉዱሮ ናኣታ ካራ ባይዚ ሳኣ ዛጌኔ።

11 ዳሮ ታኣኮ ዎዶ ኩርሶናሢሮ
ናኣታ ካታሞ ሳዞ ጎይፆይዳ ላቢ ሎኣማሢሮ
ዬኤኬ ጎይሢ ዓኣፓ ታኣኮ ዶጩኔ፤
ጎዳኣ ታኣኮ ዎኣፄኔ፥ ሃጊ ማዓ ዎዛኣ ታኣኮ ባኣያ ማዔኔ።

12 ፆልዚ ቦኦሊዳ ዱኡቴ ፖኦሊሴጉዳ
ካታሞ ሳዞ ጎይፆይዳ ላቢ ሎኣሚ ላሂ ላሂ
ዒንዶንሢኮ ቃሶይዳ ጌኤቂንቲ ዳዒ
«ዒንዳ! ሙኡዚ፥ ዎኣሢ ዒንጌ» ጌይ ዬኤኪ ዬኤኪ
ሼምፓሢ ዔያቶኮ ዬያይዳ ዱጲ ጋፓኔ።

13 ታ ዎዚ ጎፆንዶይ? ዓይጎና ታ ዒንሢ ሄካሳኒ ዳንዳዓይ?
ታኣኒ ናሽካ፥ ዬሩሳላሜ ካታሞ ዳራ!
ታ ዒንሢ ደዲሻኒ ዓይጎና ታ ዒንሢ ቤቂሶንዶይ?
ዒንሢ፥ ዬሩሳላሜ ካታሞ ዳራ!
ዒንሢዳ ሄላንዳ ባይሲንታ ዳልጎ ባዞጉዳ ዳኤፒታሢሮ

ገኑኒ ዒንሢሂ ዓውሳኒ ዳንዳዓይ?

14 ዒንሢሂም ሎንሦ ከኤዛ ዓሳ ዒንሢሂም ሉኡቁ፥ ሃሣ ዒንሢሂ ጌጌሼኔ፤

ዔያታ ሉኡዚ፥ ሃሣ ዳዳቢሻ ሎንሦ ዒንሢሂም ከኤዘኔ፤
ዒንሢሂም ጊኢጊ ዓኣ ፑርቶ ባካፓ ዒንሢሂ ማሃኒ
ዒንሢሂኮ ዳቢንቶ ዒንሢሂም ፔጋሲ ከኤዚባኣሴ።

15 « ኮሺ ሚዛጲከ» ጎገዛ፥ ዓጮ ዴራ ቢያ
ዒኢካ ሙኪ ምዛዳዛ፥ ሃኖ ካታሚሎዳ?»
ጌይ ጌይ ጎይፆና ዴንዳ ዓሳ ቢያ
ዩሩሳላሚ ዛጋ ዓሳ ቦሂሢና ኩቺ ባዒ ባዒ

ቶኦኮ ፔኤኮ ዓገሢ ዓገሢ ሚኢጫንዳ።።

16 ዒንሢሂኮ ሞርካ ቢያ ዒንሢሂ ጫሽኪ ጫሽኪ ሚኢጫ ዓማላኔ፤

ዒንሢሂ ቶኦቺ፥ ዓጮ ፔኤኮ ዳዓኔ፤
ሂዚ ጌይያኣ ዒላታኔ፡- «ኦ ዔያቶ ኩርሲናኣኮከ!
ሂዮ! ሃይማ ኦ ማሊ ሃይቃ ከሎማዋይ!
ጋፒንሢ ዑሰካ ኦ ዓካሪ ዴንቄያኣዋይ።።»

17 ናንጊና ናንጋ ጎዳ ማሌ ባኮ ማዲ ኩንሢኔ፤
ቤርታ ዒዚ ከኤዘ ቃኣሎ ማዶይዳ ፔኤሼኔ፤
ሚርጌ ምዴኮ ቤርታ ዒ ማሊ ቱከ ጎይፆ ማኣሚቃይዶ ሻሄኔ፤
ሞርካ ዒንሢሂኮ ካሮ ባይዚፆና ምዛዳንዳጉዲ ዒ ማሄኔ፤
ዒንሢሂ ሞርኮኮ ምልቆ ዒዚ ዶዲሼኔ።።

18 ዩሩሳላሚ ዴሬዮቴ! ዒንሢሂኮ ዒላታ
ከኤሎ ዲፆይዳ ማኣሞንጎ!
ናንጊና ናንጋ ጎዳ ምይዘንዳጉዲ ዒላቱዋቴ!
ዓቢፆ ዒንሢሂኮ ሞንቶንታ ሮኦርንታ ቢያ ዲጲጉዲ ምቶንጎ፤
ፔቴታፆ ሃውሺፖቴ፤ ዓኣፓ ዩኤፖ ሃሻንዳጉዲ ዚቲ ጌይፖቴ።።

19 ዲሞና ምዶ ካፒ ዔቂ ዔቂ ዒላቲ ዒላቱዋቴ፤
ዒንሢሂም ማሊንታ ባኮ ቢያ ናንጊና ናንጋ ጎዳም ከኤዙዋቴ፤
ካታሞ ሳዛ ምል ካኣማ ጎይፆይዳ ናይዲ ላቢንቲ ሎኦማ ናኣቶ
ሼምፓሢም
ናንጊና ናንጋ ጎዳ ሺኢቁ፥ ኩጮ ዒንሢሂኮ ሌካ ዔቂሱዋቴ።።

- 20 ናንጊና ናንጋ ጎዳሢዮ! ሃዳራ ኑና ዛጌ!
 ሃያኮ ቤርታ ሃያይዲ ኔኔኒ ዙሌ ዳዌ ዳሬ ዓኣኖ?
 ላኣላ ፔኤኮ ሸይ ዲቼ ናኣቶ ሙዔንቴሞ!
 ያኦሲኮ ጌኤዢ ማኣርይዳ ቄኤሶንታ
 ያኦሲ ማሊያ ከኤዛ ዓሶንታ ዎዲንቴንቴሞ!
- 21 ዴጌሢንታ ጋርቾንታ ዒማ ጎይያ ዎዲንቴ ጎይፃ ከኤሪንቴኔ፤
 ዴጌ ዓተንቆንታ ዉዲራሢንታ ሞርኮኮ ጨንቾ ዓራፓ ዎዲ
 ኩርሴኔ፤
 ኔኔኒ ዲጋዴ ዓቦና ማኣሚቃይዶ ኔ ዔያቶ ሹኪሲሴኔ።
- 22 ቦንቾ ከሊና ሙኡዚሮ ዔኤሎጉዲ ሞርኮ ቢያ ቤዛፓ ኔኔኒ
 ዔኤሌኔ፤
 ኔኔኒ ዲጋዴ ዓቦና ፔቴታዎ ሸምፔና ቶሊ ዓቴ ዓሲ ባኣሴ፤
 ታኣኒ ሸይ ዲቼ ናኣቶ ሞርካ ዎዲ ኩርሴኔ።

3

ጎሜ ቡኡዲሢና ዳቆ ዳቂንታ

- 1 ያኦሲኮ ዳጎ ኮኣሎና ጳዲንቴ ሜቶ ዛጌ ዓሲ ታናኬ።
- 2 ዒዚ ፔ ቤርታፓ ታና ፔቴታዎ ፖዒባኣ
 ዲሚ ቤሲ ዳውሲ ዳኬኔ።
- 3 ከሰኬ ዓባ ጌሊ ካራንዳኣና
 ታና ሌሊ ዒዚ ጳርቄ ጎይሣ ዳዔኔ።
- 4 ዒዚ ታኣኮ ዑያ ዓሸኮንታ ዒልዎንታ ጋርቾሴኔ፤
 ማጌያዎ ታኣኮ ማንሣኔ።
- 5 ዒናፓ ዲጋሳ ዲጋና ላቢሢና ታጊዳ ዳኪ ታና ማንጊሴኔ።
- 6 ሃይቄዎ ሚርጌ ናንጌ ዓሲጉዲ
 ዲሚዳ ታና ዳይሢ ሃሼኔ።
- 7 ኮይሎ ታኣኮ ዒዚ ዲርቄሢሮ ቶላኒ ታ ዳንዳዒባኣሴ፤
 ካኒ ቢራታና ታና ዒ ቱኬኔ።
- 8 ታና ዒ ማኣደም ታኣኒ ዒላቴቴያ
 ታኣሲ ዎይዛኒ ዒዚ ኮዒባኣሴ።
- 9 ጎይያ ታኣኮ ዓርሲንቴ ዳኤፒ ዳኤፒ ሹቹና ዲርቄኔ፤
 ታኣኒ ዳንዳ ካርዎ ሸርሺ ዎቢሴኔ።

- 10 ዒዚ ታና ሙዓኒ ካቲ ዓአ ዲቤ ጌይንታ ቦፖጉዲ፤
ጊንሣ ሃሣ ታና ዎዳኒ ጊኢጊ ዔቁ ዘቢ ማዔኔ።
- 11 ኅይፃፓ ታና ኅቹ ዔከ ሸኢሸ ሸኦሌኔ፤
ታና ማአዳያአ ባአያ ማሂ ሃሺ ዴንዴኔ።።።
- 12 ፔ ሂኢዠና ታና ዱካኒ ዓአሣኔ፤
ሆቲና ታና ዱኪ ዓይዲሳኒ ዒ ጊኢጌኔ።

- 13 ሂኢዠና ሳዘ ታኣኮ ቁርፂዲ ዱኬኔ።
- 14 ታ ዴርኮ ታኣኒ ሚኢቹ ባአዚ ማዔኔ፤
ዔያታ ኮርጋ ኬሎ ዴንዲ ዚር ሄላንዳአና ታና ቦሂ ቦሂ ኮርጋኔ።
- 15 ማቶ ታጊዳ ዲቢሲ ናንጎ ታኣኮ ጫንቁሴኔ፤
ታና ዒዚ ዋላንጋ ላይሲ ሚሽኔ።

- 16 ቃንፆ ታና ዳይሲ ዓጮ ታኣኮ ማንሣኔ፤
ሳፆ ሲላሎይዳአ ታና ሂዒ ኬኤሬኔ።
- 17 ታኣኮ ሸምፓሂ ኮሹሞ ጋዓ ባአዚ ዴንቃኒ ዳንዳዒባአሴ፤
ዎዛ ኅፆ ባአዚ ዓይጎታቲያ ታኣም ጸቁዋሴ።
- 18 ዬያር ታኣኒ፡- «ቦንቻ ታጊዳፓ ዴንዲ ባይቁኔ፤
ናንጊና ናንጋ ጎዳ ታኣም ሃጊ ዒንጋንዳአዋይ ታ ጋዓ ባካ ቢያ
ሙኪ ታና ሄላ ካራ ባአያ ማዒ ዓቲኔ» ጌዔኔ።

- 19 ታኣኮ ማቶና ካር ባይቁፆና ዛሎ ማሊፃ
ዓዳ ዋላንጋና ጨሽናጉዲ ታኣም ጫንቁኔ።
- 20 ዬያ ዛሎ ቢያ ዎዴ ታኣኒ ማላአና
ዒና ታኣኮ ኮሺ ፆያኔ።
- 21 ጋዓንቴ ፔቲ ታኣኒ ማላ ባአዚ ዓአኔ፤
ዬና ታ ማላማና ሃጊ ማዓንዳ ዎዛና ዒና ታኣኮ ሃውሻኔ።

- 22 ዬና ዓይጎዳይ ጌዔቲ፡-
ኩኢ ባይቁዎፆ ሸምፔና ዓቲ ዓአሣ
ናንጊና ናንጋ ጎዳኮ ሚጨንቴፃ ፔቲታፆ ጋፑዎፆ
ናሹማአ ናንጊና ናንጋያ ማዔሣርኬ።
- 23 ዬይ ሚጨንቴፃ ኬላ ኬላ ዓካዳኔ፤
ናንጊና ናንጋ ጎዳ ማዔ ኔኤኮ ጉሙርቁንቴፃ ዴኤፒኬ።
- 24 ናንጊና ናንጋ ጎዳ ታኣኮ ጊሸኮና ጊሺ ማዔሣር
ዒዛ ሌሊ ታኣኒ ጉሙርቃንዳኔ።

- 25 ዒዛ ጉሙርቂ ሃጋኣ ዎዛ ዒዛይዳ ጌሣዘንሢና
ዒዛ ኮዓዘንሢናም ዒዚ ኮሺኬ።
- 26 ዓሲ ዚቲ ጋዓዖ ናንጊና ናንጋ ጎዳ ዳቂሻ ዳቂሺዖ
ጉሙርቂ ካፔያታቲ ቃራኬ።
- 27 ዓሲ ዳጌ ዓኣዖ ሜቶ ጊቢ
ዳንዳዒ ዔኬቴ ኮሺኬ።
- 28 ናንጊና ናንጋ ጎዳ ዒዛይዳ ሜቶ ዓጋኣና
ዚቲ ጌይ ፔኤር ዒ ዳዔቴ ቃራኬ።
- 29 ሃጊ ጊንሣ ኮሺ ባኣዚ ሙካኒ ዳንዳዒሢር
ሳዓ ባሊቲና ላሂ ናንጊና ናንጋ ጎዳም ዓይሢንቲ ዎርቆንጎ።
- 30 ባዓሢም ጋንጋር ዳቂ ሃሾንጎ፤
ጫሺታቲያ ዔዔኮንጎ።
- 31 ናንጊና ናንጋ ጎዳ ዬያ ቢያ ማዳቲያ
ናኣናና ኬንኬሊዲ ዓሲ ሃሹዎሴ።
- 32 ዎዚ ዓሲዳ ፑርታ ባኣዚ ሄላንዳጉዲ
ዒዛ ማሊሢ ማዓቲያ
ዒዛኮ ቡሣ ዓኣዳ ዲቦ፣ ናንጊና ናንጋ ናሹዎና
ዓሲም ዒዚ ሚሚጨንታኔ።
- 33 ዬይ ያዲ ማዓሢ ዒዚ ፔ ሺኔና
ዓሲዳ ሜቶና ዖዩሢና ሄሊሱዎኣሢርኬ።
- 34 ዓጩሎይዳ ቢያ ቱኡቲ ዓኣ ዓሳ ቢያ
ጌኔ ጎይሢና ሄርቂንታሢ፣
- 35 ዳኤፖ ዖኣዛሢ ዛጋንቲ
ዓሲኮ ቶኦኪ ባይዘሢ፣
- 36 ፔቲ ዓሲኮ ጌኤሲ ዎቦ ጎይሢና ዎጊንታሢ
ጎኔና ናንጊና ናንጋ ጎዳ ሃያ ባኮ ዛጉዎዓዳ?
- 37 ናንጊና ናንጋ ጎዳ ቤርታ ማሊ ቱኪባኣ ባኣዚታቲ
ዒዛ ዓይሢ ፔቲ ባኣዚታዎ ማዲሻኒ ዳንዳዓ ዓሲ ዖናዳይ?
- 38 ፑርታ ባኣዚታቲያ ኮሺ ባኣዚ ማዲንታሢ
ዳኤፖ ዖኣዛሢ ዓይሢምኬ።
- 39 ሄዳዖ ዓካሪ ሺምፔና ዓኣ ዓሲ ፔ ጎሞና ሜቶ ዔካዖ
ጉንዱማሢ ዓይጎርዳዖ?
- 40 ኑ ሃንታ ሃንቲዖ ማሂ ኑ ዛጎም፤

- ናንገና ናንጋ ጎዳ ባንሢ ኑ ማፆሞ።
 41 ኑኡኮ ዒኖ ኑ ኩጮና ዎላ ጫሪጎጫ ዓኣ ኑ ፆኦዛሢ ባንሢ ኑ ዔቂሲ፥ ሂዚ ኑ ጎፆሞ፡-
 42 «ኑ ፆኦዛሢ! ኑኡኒ ኔኤሞ ዎይዘ ዒዳ ጎሜ ማዳኔ፤ ኔኤኒ ኑና ማኣሪባኣሴ።»
- 43 «ዳጋዲ ፑኡካኒ ዑኪ ኑና ኔ ዳውሴኔ፤ ማኣሚቃይዶ ኑና ኔ ዎዳኔ።
 44 ኑ ሺኢጲፆ ሙኪ ኔና ሄሉዋጉዲ ዲሞ ገዔ ሻኣሬና ኔና ኔኤኒ ዓኣቼኔ።
 45 ዴር ባኣኮይዳ ቡኡራጉዲ ኔ ኑና ላኣሊ ሃሺኔ።»
- 46 «ኑኡኮ ሞርካ ቢያሢ ኑና ጫሽኪ ጫሽኪ ሚኢጪ ኑና ዓማሌኔ።
 47 ዒጊቹሞና ባይሲንታና ሜቶንታ ሂርጋንታ ሙኪ ኑና ሄሌኔ።
 48 ታኣኮ ዴርይዳ ሄሌ ባይሲንቶ ዛሎ ዓቢሢ ታኣኮ ዓኣፓፓ ዎርዚ ዎኣሢጉዲ ጎዓኔ።»
- 49 «ዓኣፓ ታኣኮ ሃውሾ ባኣያ ዩኤካኔ።
 50 ዩይ ያዲ ማዒ ዴዓንዳሢ ናንገና ናንጋ ጎዳ ጫሪጎጫፓ ሊካ ዛጊ ዴንቃንዳያ ሄላንዳኣናኩ።
 51 ታኣኮ ካታሞይዳ ዓኣ ዉዲር ናኣቶ ቢያሢዳ ሄሌ ባኮ ዛሎና ታኣኒ ካራ ባይቂ ታ ዒኖና ማሊ ሜታዳኔ።»
- 52 «ጉሪ ታና ዒፆ ሞርካ ካፒሞ ፒር ፒርጉዲ ታኣሞ ፒሬኔ።
 53 ታኣኒ ሃይቂባኣንቴ ዔቴይዳ ታና ዓጊ ዔቶ ካር ሹቻ ዔያታ ዎዳኔ።
 54 ዎኣሢ ታኣኮ ዑሢና ኩሚ ዴንዳኣና ታኣኒ ሃይቃንዳ ዎዳ ዑኩያ ታኣሞ ማሌኔ።»
- 55 «ናንገና ናንጋ ጎዳሢዮ! ዳኤፖ ዔቶይዳ ታኣኒ ጌሊ ዓኣፆ ኔና ሺኢቄኔ።
 56 ታኣኒ፡- <ዎዮ ኔኤኮ ታ ባንሢ ማሄ፤ ዑኩና ሙኪ ታና ማኣዴ> ጌይ ሺኢቃሢ ኔኤኒ ዎይዜኔ።»
 57 ታኣኒ ኔና ዔኤሌ ዎዶና

ኔኤኒ፡- «ዒጊጨገ!» ጌይ ታና ዶዲሼኔ።

58 «ናንጊና ናንጋ ጎዳሢዮ! ኔኤኒ ታ ዛሎ ሞኦቲ
ታና ኔኤኒ ዓውሴኔ።

59 ናንጊና ናንጋ ጎዳሢዮ!
ታኣሞ ማደና ጌኖ ቢያ ኔኤኒ ዛጌሢር
ታኣሞ ጌሰቲ ዎጌ።

60 ታኣኮ ሞርካ ታና ኮማኒ
ዎላ ጌሰቲ ቱኩ ቱኡዞ ኔኤኒ ዴንቄኔ።»

61 «ናንጊና ናንጋ ጎዳሢዮ!
ታና ዔያታ ጫሽኬ ጫዠና
ታኣሞ ዔያታ ማሌ ጌኖ ኔ ዎይዜኔ።

62 ኬሰኬ ዓቢ ዴንዲ ጌሊ ካራንዲያ ሄላንዳኣና
ሞርካ ታና ባይዞንዶ ጎይዖ
ዎላ ካሽካሺ ጌሰታኔ።

63 ዔያታ ዴዒያ ማፆሞ ዔቂ ቶሳ ቶሶና
ታና ጫርጋ ጫጮ ዔያቶኮ ዛጌ።»

64 «ናንጊና ናንጋ ጎዳሢዮ! ዔያታ ማዴ ባኮ ዛሎ
ኮይሳማጉዴያ ማሂ ዔያቶሞ ዒንጌ።

65 ዔያቶ ጋዳንቂ
ካራ ዔያቶኮ ባይዜ!

66 ናንጊና ናንጋ ጎዳሢዮ! ኔ ዳጎና ዔያቶ ደውሴ፤
ጫሪንጮ ዴማፓ ጋፒሲ ዔያቶ ኩርሴ!»

4

ዬሩሳላሜይዳ ሄሌ ሜቶ

1 ጌኤዠ ማኣር ማዠና ሹጫ ጉሪ ዞኦሰካ ኬኤሪንቴኔ።
ዎዎይቲዎ ዎርቃ ሳልፔንቴሞ!
ጌኤዠ ዎርቃ ሜሌ ባኣዚ ማዔንቴሞ!

2 ዲዮኔይዳ ዓኣ ዓቲንቆ ናኣታ ጌኤሺ ዎርቁጉዲታፆኬ፤
ሃይሾ ሃሢ ማኒ ዠኢጪጭ ዓጨና ማዠ
ሜሃ ማዒ ዓቲንቴሞ!

3 ዉኡካሢታፆ ፔኤኮ ሾፆና ናኣቶ ዳዳንሢሢ፤
ሃይ ታኣኮ ዴራ ዓሲ ናንጉዎ ደውሎይዳ ዓኣ ቱኡቴጉዲ

ፔኤኮ ናኣቶም ሚጨንቱዋያ ማዕንቴሞ!

4 ናኣቶ ዔያቶኮ ዋእፃ ዴኤቤሢሢረ ናኣቶኮ ዒንዲርዘ
ዲንጎይዳ ዒዲንጎቴ ዴዔኔ፤

ናኣታ ዔያቶኮ ሙኡዚ ሺኢቃኔ፤

ጋዓንጎቴ ፔቴታዎ ዔኤቢ ዔያቶም ዒንጋ ዓሲ ባኣሴ።

5 ሃያኮ ቤርታ ቃውቲ ቃውቲ ኮሺ ባኣዚ ሙዓ ዓሳ
ካራ ባይዚ ሴካ ሃንጋ ጉሪ ዜኤማኔ።

ጋላፒ ማዔ ሚዛጶ ማኣዓሢ ማይንጎቴ ዲጩ ዓሳ

ሃሢ ዲቢንሢሢ ላኣሎ ዲባይዳ ፔና ሃሺ ላሄኔ።

6 ታ ዴሮይዳ ሄሌ ሜታ

ዎኢኒያ ካኣሙዋንጎቴ ዶዒ ባይቄ

ሶዶሜ ካታሞ ሜታፓ ባሻያኬ።

7 ካኣቶ ናኣቶ ማዔ ዔያቶ ሱኡጋ ዔያቶ ኮይላ

ሻቺፓ ባሼ፤ ዲኢቂፓኣ ባሼ ጌኤሽኪ ጴዳያኬ፤

ዔያቶኮ ሚዛጶማ ሴንፔሬ ጌይንታ ሹጮጉዲኬ።

8 ሃሢ ጋዓንጎቴ ዓኣፖ ካራ ዔያቶኮ ጨላንቺጉዲ ካርቴኔ፤

ዘኣዛ ዔያታ ሜታዲ ሃንታኣና ዔያቶ ዔራ ዓሲያኣ ባኣሴ፤

ሜልዚ ሚሢጉዲ ዒልዓ ዔያቶኮ ዑዎይዳ ፓፂ ባይቄኔ።

9 ናዮና ሃይቄ ኩዳ ዓሶይዳፓ

ጨንቾ ዓራፖና ዋዶ ዓሳ ቃራኬ፤

ሙዓ ባይቄሢረ ዓሳ ዞኣዛ ናዮና ሜሊ ጉሪ ኩዳኔ።

10 ባይሲንታ ኬዴም ካታማ ካራ ባይቄ ዋዶና

ናኣቶ ሚጨንታ ላኣላ ፔ ኩቻ ፔኤኮ ናኣቶ ካሢ ሙዔኔ።

11 ናንጊና ናንጋ ጎዳ ፔኤኮ ዴኤፖ ዳጎ ዴንሢ

ፂዮኔኮ ፃጶ ሙይ ዶዶይሳንዳ ታሚጉዲ

ዔዔኤታ ፑርታ ባኣዚ ኬይሴኔ።

12 ዓጮ ቢያሢዳ ዓኣ ካኣቶሞ ሞዎም ዴራ

ዬሩሳላሜ ካታሞኮ ጌሎ ካሮና

ሞርኬ ጌላንዳኔ ጌይ ፔቴታዎ ማሊባኣሴ።

13 ጋዓንጎቴ ዬይ ያዲ ማዔሢ ዒኢካ ጌኤኩፍ ዓሶ ዋዶ

4:6 ማኸ. ማፃ 19:24። 4:10 ላሚ. ዋማ 28:57፤ ሂዚ. 5:10።

ቄኤሶንታ ያኮሲ ማሊያ ኬኤዛ ዓሶ ጎሞ ዛሎናኩ።

14 ዔያታ ዬያ ሱጉያና ዒኢቴያታሢሮ
ዔያቶኮ ማአዓሢታያ ጨርቂ ካአማ ዓሲ ባአሴ፤
ዔያታ ዓአፒ ባይቄ ዓሲጉዲ ጎይያይዳ ሴካ ሃንጋ ቴኤም ጋዓ።

15 ዬያሮ ዳራ፡- «ዳንዲ ባይቁዋቴ!
ዒንሢ ዒኢቴ ዓሲታሢሮ ኑና ሄሊፖቴ!» ጌይ ዒላታ።

ዬያሮ ዔያታ ዒዲ ዳውሶና ዓሲ፣ ሃሃ ቤሲ ባይዜ ዓሲ ማዔ፤
ዳራ፡- «ሃካፓ ሴካ ማይ ዔያታ ኑ ባአካ ዳይንዲዋሴ» ጌዔ።

16 ናንጊና ናንጋ ጎዳ ዔያቶ ፔኤሮ ዜሪ ዳኬሢሮ
ሃካፓ ሴካ ዒዚ ዔያቶ ዛሎ ማላዓኬ፤
ቄኤሶዋ ዒዚ ቦንቺሳዓኬ፤
ዒኢካ ዓአ ጋርቾማአ ኮሺ ባአዚ ማዲንታዓኬ።

17 «ኑና ማአዳንዲያ ሙካንዳኔ» ጌይ ኑ ጎይሢ ዛጋአና ላቤ፤
ኑና ዓውሳኒ ዳንዳዑዋ ዓሲ ኑኡኮ ሴኤሎይዳ ዔቂ ኑ ጉሪ
ካፔ።

18 ኑኤኒ ጎይያይዳና ሴካ ሃንጋ ሃንቱዋጉዲ
ሞርካ ኑና ዚርቂ ዔቂ ካፓ፤
ኑኡኮ ጋፒ ዋዴ ሄሌ፤ ሴሊ ኑም ማንሦናአኬ፤
ኑኤኒ ኩዲኒ ዑኬ።

19 ኑና ዳውሳ ሞርካ ኮኦኬይዳፓ ባሽ ሩኡራያኬ፤
ዲኮ ዑያይዳ ኑና ዳውሴ፤
ዓሲ ናንጉዋ ዳውሎ ቦኦሎይዳአ ኑና ካቴ።

20 ናንጊና ናንጋ ጎዳ ካአቲ ማሂ ዶአሜ
ኑኡኮ ሸምፓሢኮ ዑኡዘ ማዔሢ
ዔያታ ፔ ፒራሢና ፒሪ ዓይሣ፤
ዒዛ ሸሲ ዳማ ዳዒ
ዳሮ ባአኮይዳ ናንጋንዳኔ ጌይ ኑኤኒ ማሌንቴኬ።

21 ዒንሢ ዑዲይዳ ናንጋ፣ ዔዶአሜ ዳራ
ዋዛዲዋቴ፣ ዒላሹዋቴ!

ጋዓንቴ ዒንሢሞ ጊኢጊሾና ጳጳሢ
ፔ ዎዶ ካፒ ሙኮ ባታዓኬ፤
ዒንሢያ ማሢንቴ፥ ማኣዓሢ ኬኤሪ ካላዳንዳ።

22 ዩሩሳላሜ ዴሪዮቴ! ዒንሢ ዳቢንቶሮ
ዒንሢሞ ዓጎና ፑርቶ ባካ ጊዳንዳ፤
ናንጊና ናንጋ ጎዳ ዑኬና ዒንሢ ዳውሲንቴ ዴንዴ ባዛፓ
ማሃንዳ፤
ጋዓንቴ ዔዶሚያሴ ዴሪዮቴ! ዒንሢ ዳቢንቶ ዛሎ
ናንጊና ናንጋ ጎዳ ዒንሢዳ ሜቶ ዓጋንዳ፤ ዳቢንቶዎ ዒንሢኮ
ፔጋሳንዳ።

5

ፆኦሲ ሚጨንታንዳጉዲ ሺኢቁንቴ ሺኢጲሢ

1 ናንጊና ናንጋ ጎዳሢዮ! ኑና ሄሌ ባኮ ዛሎሮ ኑም ማሌ፤
ኑኡኮ ዳውሲንቶ ዛጌ!

2 ኑኡኮ ዴና ዔውቴ ሜሌ ዓሲም ዒንጊንቴ፤
ኑኡኮ ኬኤፃ ቢያ ሜሌ ፆንጎ ዓሲ ናንጋ ኬኤሢ ማዔ።

3 ኑኡኒ ዓዴ ሃይቄ ዜኤሪ ማዔም
ኑኡኮ ዒንዶንሢያ ዜኤሪ ዒንዶ ማዔ።

4 ኑኡኒ ዑሽካ ዎኣፆንታ
ካያፓ ሃኣኮ ሃንፂሎንታ ሻሻንቃ።

5 ኑና ዳውሳ ዓሳ ኑኡኮ ባቃና ዴዒ ዓኣ፤
ኑኡኒ ላቤ፥ ሃውሾዎ ኑኡኮ ባኣሴ።

6 ኑም ጊዳ ሙኡዚ ዴንቃኒ ጊብፄ ዓጮና
ዓሶኦሪ ዓጮናም ኩቺ ኑ ዒንጌ።

7 ኑ ዓዶንሢ ጎሜ ማዲ ኑም ሃሼ፤
ኑኡኒ ዔያቶም ዓጎና ሜቶ ዔኪሢዳኬ።

8 ሃያኮ ቤርታ ዓይሌ ማዔ ዓሳ ሃሢ ኑና ዎይሃያ ማዔ፤
ዔያቶ ኩጫፓ ኑና ዓውሳኒ ዳንዳዓ ዓሲያኣ ባኣሴ።

- 9 ደውሎ ቦኦሎይዳ ዋዳ ዓሲ ዓአሢሮ
 ኑኡኒ ሙዖ ባአዚ ዳንቃኒ ዳንዳዓሢ
 «ዋዳቴ ዋዳ፣ ዳቂሼቴ ዳቂሼ» ጌይኩ።
- 10 ናያ ኑና ባሼሢሮ
 ዑፃ ኑኡኮ ናአቦጉዲ ጨላንቄኔ።
- 11 ኑኡኮ ለአላ ሂዮኔይዳ
 ኑኡኮ ዉዲሮ ናአታአ ዪሁዳ ካታሞይዳ
 ዋልቄና ዓርቂንቴኔ።
- 12 ኑ ሱኡጎኮ ኩጮ ቱኪ ሱዲ ዋዳናኔ፤
 ኑኡኮ ጋርቾዋ ቦንቺቦኦሴ።
- 13 ዓቲንቆ ዳጌሢ ዋልቃዲ ዋንሢ ዋዲሾናኔ፤
 ዓቲንቆ ናአቶ ዳካአ ዴኤሢ ሃንዲሌ ኩዲና ሜታዳኔ።
- 14 ዓጮ ጋርቻ ዳይ ዋጎ ዋጋ ቤዞ ሃሺ ዳንዳኔ፤
 ዳጌሢያ ኮርጋ ኮፆ ሃሼኔ።
- 15 ዋዛ ኑኡኮ ዒናፓ ባይቄኔ፤
 ኑ ዋንዴ ዋዛዲ ኮርጋ ኮፆ ባይዚ ያዪሢ ዓርቄኔ።
- 16 ቦንቻ ኑኡኮ ዔውቲ ባይቄኔ፤
 ኑኡኒ ጎሜ ማዳሢሮ ኑና ባዴዔ!
- 17 ያዲ ማዔሢሮ ኑኡኒ ሃርጌ ዓሲ ማዔኔ፤
 ዓአፓአ ኑኡኮ ፒዜ ዛጎ ባሺንቲ ላቤኔ።
- 18 ሂዮኔ ዳካ ዓሲባአያ ጉሪ ቤሲ ማዒ ዓቲሢሮ
 ዉኡካ ዒኢካ ዓማሊ ሺራ ቤሲ ማዔኔ።
- 19 ኔኤኒ ጋዓንቴ ናንጊና ናንጋ ጎዳሢዮ! ናአናና ካአቲኩ፤
 ኔኡኮ ካአቲሞ ያይታ ሙካ ዋዶ ቢያይዳ ባይቃዓኩ።
- 20 ኔ ኑና ዋይታዛ ጋፒ ዋሊ ሃሼዮ?
 ሚርጌ ዋዴ ኔ ኑና ኩንኩሊዲ ሃሼንቴሞ?

21 ናንጊና ናንጋ ጎዳሢዮ! ኔ ባንሢ ኑና ማሄ፥ ኑኡኒ ማዓንዳኔ፤
ኑኡኒ ናንጋ ናንጎ ቤርታኣ ዋድጉዲ ማሄ ጊንሣ ኮሹ።

22 ኔኡኒ ዬያይዲባኣቴ ጋፒ ኑና ኔ ሃሺ
ኑኡኒ ማዳ ባኮሮዋ ዑሣ ዓኣዳ ኔ ዳጋዳኔ ጌይሢኩ።

ጌኤዢ ማጻሕፍት
The Holy Bible in the Maale language of Ethiopia,
using Ethiopic script

copyright © 2008 The Word for the World International and The Bible Society of Ethiopia

Language: Maale (Male)

Translation by: The Word for the World

Contributor: Bible Society of Ethiopia

ጌኤዢ ማጻሕፍት

Maale Full Bible

The Word For The World International

Bible Society of Ethiopia

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-13

PDF generated using Haiola and XeLaTeX on 13 May 2025 from source files dated 13 May 2025

bbcfb90a-3ae3-5452-983d-6c4c02375929